

四庫全書

經部

欽定四庫全書

儀禮要義卷四十五

宋 魏了翁 撰

特牲饋食禮二

自此主人主婦及祝佐食陳陰厭

主人及祝升祝先入主人從西面於戶內

釋曰自此盡稽首論主人主婦及祝與佐食陳設陰厭之事云主人從西面於戶內注引少牢者證主人戶內

西面其時祝北墉下南面之事以其未有祝行事之法直監納祭而已下文乃云祝在左為孝子釋辭乃有事也

主人親舉宗人執畢臨匕載備失脫

畢狀如乂蓋為似畢星取名

宗人執畢先入當阼階南面釋曰云畢狀如乂者下引舊說有他神物惡桑乂之言故以乂而言云蓋為其似畢星取名焉者案詩云有捄天畢載施之行無正丈

故云蓋以疑之也云主人親舉宗人則執畢導之既錯  
又以畢臨匕載備失脫也知義然者以經云當阼階南  
面明鄉主人執畢臨匕備失脫可知也

喪祭匕畢用桑吉祭用棘心

雜記匕畢同用桑據喪祭今吉祭匕用棘心則畢亦棘  
心也云舊說云畢以御他神物神物惡桑又舊說如此  
又引少牢士虞已下破舊說之意也云此無义者乃主  
人不親舉耳者揔解士虞少牢二禮云少牢大夫祭不

親舉者大夫尊主人不親舉云虞喪祭也主人未執事者對吉祭主人執事有畢彼無也云祔練祥執事用桑爿者以其虞時主人不執事則祔已執事執事用桑爿則雜記所云是也云自此純吉用棘心爿者除祥後則禫月及吉祭用棘心也案易震卦彖辭云震來虩虩笑言啞啞震驚百里不喪匕鬯鄭注云雷發聲於百里古者諸侯象諸侯出教令能警戒國內則守其宗廟社稷為之祭主不亡其匕鬯人君於祭匕牲體薦鬯而已

其餘不親為也若然諸侯親匕牲體大夫不親者辟人君士卑不嫌得與人君同親匕也

俎設鼎西西肆匕加于鼎東枋

贊者錯俎加匕 釋曰云其錯俎東縮加匕東枋者少牢云俎皆設於鼎西西肆又云匕皆加於鼎東枋則此加匕於鼎東枋可知

所俎謂午割心舌于尸前所之為言敬

佐食升所俎鼎之設於阼階西知所謂心舌者下記云

所俎心舌皆去本末午割之實於牲鼎載心立舌縮俎是也引郊特牲者見敬有所俎送于尸前郊特牲曰所之為言敬也言敬尸之俎

凡饌必方明食味人之性所以正

主人升入復位俎入設於豆東魚次腊特于俎北入設俎載者腊特饌要方也凡饌必方者明食味人之性所以正云腊特饌要方也者案經豆在神坐之前承俎入設於豆東魚俎又次其東若腊俎復在東則饌不得方

故腊俎特于俎北取其方

士祭少于少牢主婦親之宗婦不贊

主婦設兩敦黍稷于俎南西上及兩鉶芼設于豆南南  
陳 釋曰案少牢主婦設金敦宗婦贊三敦以其多故  
使宗婦贊此士祭祀二敦少故不使宗婦贊主婦可親  
之也若然案少牢佐食贊鉶宗婦不贊鉶此不以佐食  
決之而并云宗婦者此決有司徹故有司徹云主婦洗  
于房中出實爵尊南西面拜獻尸尸拜於筵上受主婦



西面於主人之席北拜送爵入於房取一羊鉶坐奠于  
韭菹西主婦贊者執承鉶以從主婦不興受設於羊鉶  
之西又下至主婦致爵于主人主婦設二鉶與糗脩如  
尸禮皆是也

佐食啓會乃奠奠乃啓會大夫士異

祝洗酌奠奠于鉶南遂命佐食啓會佐食啓會卻于敦  
南出立于西南面酌奠奠其爵解也少牢饋食禮啓  
會乃奠之 釋曰引少牢者案少牢祝酌奠遂命佐食

佐食啓會乃奠者彼大夫禮與此士禮相變是以與此奠乃啓會異也

祝代主人迎尸于門外主人不迎成尸尊

祝迎尸于門外 釋曰自此盡反黍稷于其所論陰厭後迎尸于正祭之事云尸自外來代主人接之者下注云主人不迎尸成尸尊故也云就其次而請不拜不敢與尊者為禮者凡平賓客皆在門西主人出門左西面拜今此經直云迎尸于門外不言祝拜尸荅拜是祝出

就次尸乃出次迎之而入門是不敢與尊者為禮引周禮者證門外張尸次之事

周禮掌次有張尸次謂更衣處

廟中則尸尊廟門外則君尊

云主人不迎尸成尸尊者案祭統云君迎牲而不迎尸別嫌也尸在廟門外則疑於臣在廟中則全於君君在廟門外疑於君入廟門則全於臣全於子鄭云不迎尸者欲全其尊也尸神象也鬼神之尊在廟中人君之尊

出廟門則伸此士禮雖無君道亦尊尸主人不迎迎之尊不成不迎之則成尸之道尊也云尸所祭者之孫也者禮記云孫為王父尸是也云祖之尸則主人乃宗子者以其祭祖兄弟來助祭故知宗子小宗大宗五宗皆然書傳云宗子將有事族人皆入侍也云禰之尸則主人乃父道者禮記祭統云夫祭之道孫為王父尸所使為尸者於祭者子行也父北面而事之所以明子事父之道也此父子之倫也注云祭祖則用孫列皆取於同

姓之適孫是其禍之尸則主人乃父道也云事神之禮廟中而已出迎則為厭出廟門主人有君厭臣之義故不迎也

主人拜妥尸尸荅拜祝饗稱孝子

尸荅拜執奠祝饗主人拜如初饗勸彊之也其辭取于士虞記則宜云孝孫某主為孝薦之饗舊說云明薦之釋曰喪祭稱哀吉祭稱孝故士虞記卒哭饗尸辭曰哀子某主為哀薦之饗此既吉祭宜云孝孫某主為孝

薦之饗以其改哀云孝故曰宜云也引舊說者證圭為潔明之義也

設饌飫神為陰厭今尸按祭食神餘

祝命按祭尸左執觶右取菹按于醢祭于豆間 釋曰

云按祭祭神食也者鄉者設饌未迎尸陰厭厭飫神今尸來升席而按祭祭訖當食神餘引周禮而云墮與按讀同則二字通用云今文改按皆為綏不從今文引古文者欲見按下有祭無醢故壘之而不從也云按醢者

染於醢從經為正也

生人禮大羹湑在薦右神禮在左喪用生禮

設大羹湑于醢北

釋曰云醢北者為薦左案公食大

夫昏禮大羹湑皆在薦右此在左者神禮變於生人士  
虞禮大夫羹湑設于鉶南在右與生人同有不忍異於  
生故也云不和貴其質者案桓二年左氏傳云大羹不  
和以鹽菜是貴其質

大羹湑陰厭時未設為尸不為神

云不為神者陰厭時未設尸來始設為尸故士虞記云  
無尸則禮及薦饌皆如初不授祭無大羹湑斂從獻有  
尸即有大羹湑從獻縱有亦不祭不齊是不為神為尸  
非盛者也引士虞禮曰大羹湑自門入者證迎尸後乃  
從獻來也

所俎主於尸主人親羞尊賓以事先

主人羞所俎于腊北 云所俎主於尸者以其入後乃  
設之故知主於尸主人親進者敬尸故也前神俎使載



者設之者欲得尊賓客以事其先故也

主人洗角酌醕尸

主人洗角升酌醕尸 釋曰自此盡入復位論主人獻尸及祝佐食之事知是獻尸者下有主婦洗爵獻尸并賓長獻尸故知此是主人酌尸也云不用爵者下大夫也者此決少牢云主人降洗爵酌酒乃酌尸用爵不用角也

祝爵授尸以醋主人尸尊不親洗爵

祝酌授尸尸以醋主人注醋報也祝酌不洗云云 釋曰  
云祝酌不洗者尸當酢主人宜親洗爵酌酒不親洗酌  
尸尊故也授代酌由祝代酌故不洗也

士尸親嘏主人大夫尸尊不親

佐食搏黍授祝祝授尸尸受以菹豆執以親嘏主人

釋曰案少牢云祝與二佐食皆出盥於洗入二佐食各  
取黍於一敦上佐食兼受搏之以授尸尸執以命祝卒  
命祝祝受以東北面于户西以嘏于主人但少牢不親

嘏者大夫尸尊又大夫禮文此親嘏者士尸卑禮質故也云其辭則少牢饋食禮有焉者案少牢云祝以嘏于主人曰皇尸命工祝承致多福無疆于女孝孫來女孝孫使女受祿于天宜稼于田眉壽萬年勿替引之是也

祭用黍者食之主上文爾黍不爾稷

云獨用黍者食之主者案上文云爾黍于席上不云爾稷者以稷雖五穀之長不如黍之美故云食之主是以喪大記云君沐梁大夫沐稷士沐梁士喪禮士沐稻諸

侯之士鄭注云差率而上天子沐黍

主人受嘏詩懷之挂祛以季指

主人左執角再拜稽首受復位詩懷之實於左袂挂於季指卒角拜尸答拜詩猶承也謂奉納之懷中季小也實於左袂挂祛以小指者便卒角也少牢饋食禮曰興受黍坐振祭嚕之古文挂作卦 釋曰云挂祛以小指者便卒角也但右手執角左手挂祛以小指不於左手言便卒角者飲酒之時恐其遺落故挂以小指

佐食俎敝折至賓尸時無俎

祝左執角祭豆興取肺坐祭臠之云云 云主人答拜  
受角酌獻佐食者案上獻祝有俎此獻佐食不言俎者  
上經云云執事之俎陳於階間二列北上鄭注云執事  
謂有司以佐食亦在有司內者下記云佐食俎敝折脊  
脅也又下經賓長獻節鄭注云凡獻佐食皆無從其薦  
俎獻兄弟以齒設之若少牢獻佐食俎即設於兩階之  
間西上大夫將賓尸故即設佐食俎至於賓尸時佐食

無俎也

主婦酌亞獻尸不夾拜

主婦洗爵于房酌亞獻尸注亞次也次猶貳 釋曰自此盡以爵入于房論主婦獻尸祝及佐食之事云主婦貳獻不夾拜者士妻儀簡耳者此決少牢主婦亞獻尸時夾拜此士妻下之

尸酢主婦如主人儀不易爵辟內子

尸酢如主人儀 釋曰云尸酢主婦如主人儀者自祝

獻至尸拜送如酢主人也云不易爵辟內子者以經云  
酢如主人儀上尸酢主人時不易爵故此主婦受酢亦  
不易爵可知男女不相襲爵所以今襲爵者辟內子是  
以少牢云祝受尸爵尸荅拜易爵洗酌授尸主婦拜受  
爵尸荅拜是其易爵也

尸止爵以待神惠之均于室中

賓三獻如初燔從如初爵止注初亞獻也尸止爵云云  
釋曰自此盡卒復位論賓長獻尸及佐食并主人主

婦致爵之事此一科之內乃有十一爵賓獻尸一也主  
婦致爵于主人二也主人酢主婦三也主人致爵于主  
婦四也主婦酢主人五也尸舉奠爵酢賓長六也賓長  
獻祝七也又獻佐食八也賓又致爵于主人九也又致  
爵于主婦十也賓獻主人酢十一也云初亞獻也者知  
不初獻者以主婦亞獻承初獻後賓長又承亞獻後故  
知如亞獻不得如初獻也又面位及燔從皆如亞獻也  
云三獻禮成欲神惠之均於室中是以奠而待之者謂



尸得三獻而禮成言其實飲三爵祝與佐食亦得三獻  
主人主婦各得一酢而已未得獻是神惠未均奠而待  
之者待主人主婦致爵乃均也案下文衆賓長為加爵  
如初爵止鄭注云尸止爵者欲神惠之均于在庭止得  
一獻亦言均則不以爵數為均直據得一獻則為均也  
主人更爵自酢男子不承婦人爵

主人降洗酌致爵于主婦云云主人更爵酌醋卒爵云  
云云主人更爵自酢男子不承婦人爵也者案上主婦

獻尸尸酢主婦不易爵鄭注云辟內子致爵于主人則  
易爵也若然案下記設洗篚在洗西實二爵鄭注云二  
爵者為賓獻爵止主婦當致也此賓長所獻爵尸奠之  
未舉其篚唯有一爵得云易者上主婦亞獻洗爵洗爵  
于房中則房中有爵又主婦獻祝及佐食訖以爵入于  
房後主婦致爵于主人還是房內爵後主人致爵于主  
婦者是下篚之爵主婦飲訖實于房中之篚主人更取  
房內之爵以酌酢酢訖奠于下篚云主人更爵者謂酌

酢爵與房內爵相更鄭注下記云主婦當致者謂主人致爵於主婦則用下篚內爵也

洗爵以致于主人主婦以承賤者爵

尸卒爵酢酌獻祝及佐食洗爵酌致于主人主婦云云釋曰此決上丈賓獻尸獻祝及佐食不洗今致于主人洗故決之也案下篇不饋尸洗爵致于主人注云以承佐食賤新之此云為異事新之注不同者但為異事異事則是承賤承賤後則事異

飲射賓主獻酢各專階此賓輕不專

主人降阼階西面拜賓如初洗 釋曰自此論獻賓及  
衆賓云就賓拜者此禮不主於尊也者案鄉飲酒鄉射  
賓主獻酢各於其階至酬乃同階此因祭如初賓非為  
尊之所尊者謂尸也又賓是士家有司卑不得專階故  
就之使不得專階也對鄉飲酒鄉射得專階也云主人  
在右統於其位者以其賓得在西階上北面以東為右  
主人位在阼階故云統于其位鄭言此者主人就西階

異於飲酒主人在右則與飲酒禮同以言主人常居右也

凡節解牲體皆曰折升俎名折俎

薦脯醢設折俎 釋曰案下記云賓骼鄭云骼左骼也賓俎全體尊賓也折骨而曰折俎明凡節解牲體皆曰折升于俎故名折俎與臠折同名其折義則異彼折骨云不言其體略云折俎非貴體也者案下記云賓骼骼是牲體此經云折俎者亦用骼非貴體

飲射賓親酢此賓不敢敵主人主人自酢

賓卒爵拜主人荅拜受爵酌酢奠爵拜賓荅拜云賓不敢敵主人主人達其意者以其賓是士之屬有司之中以卑不敢與主人為敵酢之是以主人酌以自酢達賓意故也若鄉飲酒鄉射賓皆親酢主人以其賓尊行敵禮

獻賓兄弟酌上尊旅酬禮褻酒在下

尊兩壺於阼階東加勺南枋西方亦如之 釋曰自此

盡揖復位論堂下設尊酬賓之事云行神惠不酌上尊  
卑異之者決上丈獻賓及兄弟皆酌上尊者獻是嚴正  
故得與神靈共尊至此旅酬禮褻故不敢酌上尊案司  
尊彛職四時之祭云皆有彛諸臣之所酢少牢上下大  
夫堂下皆無尊者士卑得與人君同大夫尊辟人君故  
也云兩壺皆酒優之者設尊之法皆有玄酒今兩壺皆  
酒無玄酒優之也案玉藻云唯饗野人皆酒鄭云飲賤  
者不備禮與此注無玄酒為優之異者此士之祭禮欲

得尊賓嘉客以事其先非賤者故以皆酒為優之彼饗  
野人野人是賤者故以不備禮解之也云先尊東方示  
惠由近者東方主人位西方賓位今先設東方乃設西  
方者見酒由主人來故云示惠由近為始也引禮運者  
彼注澄為沈齊酒是三酒酒所以飲諸臣證此壺尊亦  
飲在下者也案禮運澄酒在下

神惠右不舉生人飲酒左不舉

主人奠觶於薦北 釋曰以其神惠右不舉生人飲酒



左不舉今行神惠不可同於飲酒故奠於左與生人相變故有司徹云二人舉觶酬尸侑侑奠觶于右鄭注云奠于右者不舉也神惠右不舉變於飲酒是也此酬奠於薦左下文賓舉為旅酬以其神惠故也言不可同飲酒者謂不可同於鄉飲酒故鄉飲酒記云將舉者於右奠者於左其義與此別

酬賓乃獻兄弟獻之禮成於酬

主人洗爵獻長兄弟于阼階上如賓儀 釋曰自此盡

如衆賓儀論主人獻長兄弟及衆兄弟之事云酬賓乃  
獻長兄弟者獻之禮成於酬者以其獻賓之禮以酬副  
之乃禮成故冠禮云乃禮賓以一獻之禮鄭注云獻酢  
酬賓主人各兩爵而禮成又鄉飲酒獻及酬賓訖乃獻  
介又此文獻賓即酬賓乃獻兄弟故鄭注獻之禮成於  
酬也云亦有薦胥設於位者以經云獻長兄弟於阼階  
上如賓儀則長兄弟初受獻於阼階上時亦薦脯醢設  
折俎於阼階上祭訖乃執以降設於下位皆當如賓儀

內兄弟姑姊妹及宗婦

洗獻內兄弟於房中如獻衆兄弟之儀 釋曰自此盡  
入復位論主人獻姑姊妹及宗婦之事云內賓宗婦也  
者此摠云內兄弟下記云內賓宗婦案彼注云內賓姑  
姊妹宗婦族人之婦若然兄弟者服名故號婦人為兄  
弟也云其位在房中之尊北者案下記云尊兩壺於房  
中西墉下南上內賓立於其北東面南上宗婦北堂東  
面北上是也云不殊其長略婦人者決上文獻賓於西

階上獻兄弟於阼階上皆殊其長此不殊故云略之引  
有司徹者欲見此內賓受獻時亦南面拜受爵故下注  
云內賓之長亦南面答拜言亦者亦前受獻時前雖無  
丈約有司徹內賓之長亦南面答拜

獻內兄弟爵辯乃自酢以不殊其長

云爵辯乃自酢以初不殊其長也者對上賓與長兄弟  
不得獻衆賓衆兄弟徧主人先自酢也云內賓之長亦  
南面答拜者獻時不殊其長酢時猶如賓及兄弟殊其

長與男子同男子婦人衆賓以下皆無酢也

天子至士獻數降殺以兩多之為加


長兄弟洗觚為加爵如初儀不及佐食洗致如初無從  
釋曰此一經論士三獻之外為加獻尸之事云如初  
儀者如賓長三獻之儀但賓長獻十一爵此兄弟之長  
加獻則降唯有六爵以其闕主人主婦致爵并酬四爵  
及獻佐食五唯有六在者洗觚為加獻一也尸酢長兄  
第二也獻祝三也致爵於主人四也致爵於主婦五也

受主人酢六也云大夫士三獻而禮成者天子大祫十有二獻四時與禘唯有九獻上公亦九獻侯伯七獻子男五獻卿大夫士略同三獻而祭禮成也是以多之者為如若主人飲酒禮卿大夫三獻士唯一獻而已祭禮士與大夫同者攝盛葬奠亦與大夫同少牢五鼎又乘車建旌亦與卿大夫同也

庭賓及兄弟未得旅酬尸止爵以均惠

衆賓長為加爵如初爵止 釋曰庭賓及兄弟雖得一

獻未得旅酬其已得三獻又別受加爵故停之使庭行  
旅酬是以云尸爵止者欲神惠之均於在庭也



儀禮要義卷四十五

欽定四庫全書

經部

儀禮要義卷

四十六至  
五十五

詳校官監察御史臣李陽城

侍讀臣孫球覆勘

總校官中書臣朱 鈐

校對官中書臣王 璜

謄錄監生臣史映綵



欽定四庫全書

儀禮要義卷四十六

宋 魏了翁 撰

持牲饋食禮三

士有嗣子舉奠少牢無著辟君

釋曰自此盡出復位論嗣子飲奠酌獻之事云嗣主人將為後者不言適而言將為後者欲見無長適立庶子及同宗為後皆是故汎言將為後也云舉猶飲也者非

謂訓舉為飲直是嗣子舉而飲之耳云將傳重累之者  
謂將使為嗣牽累崇敬承重祭祀之事是以使飲之而  
獻也云大夫之嗣子不舉奠辟諸侯者案文王世子云  
其登餼獻受爵則以上嗣注云上嗣君之適長子以特  
牲饋食禮言之受爵謂上嗣舉奠也獻謂舉奠洗爵酌  
入也餼謂宗人遣舉奠盥祝命之餼也大夫之嗣無此  
禮辟君也今案少牢無嗣子舉奠之事故此注云辟諸  
侯士卑不嫌得與人君同故有嗣子舉奠之事也奠者

即上文祝酌奠奠於鉶南是也

賓啐酒即酢主人此賓啐無酢嗣子

尸執奠進受復位祭酒啐酒云云又祭酒啐酒奠之云  
啐之者答其欲酢已也者鄉飲酒鄉射主人獻賓賓皆  
啐酒洗爵即酢主人此嗣子獻賓賓啐之亦欲酢已故  
啐之其實無酢

嗣齒於子姓凡非主人不由酢

云嗣齒於子姓者姓之言生子之所生謂孫行者今嗣

亦孫之流故齒之也云凡非主人升降自西階者案曲禮云為人子者升降不由阼階是以嗣子亦宜升降自西階適子孫不升阼階故於此摠言凡也

弟子獻長兄弟長兄弟拜弟子北面答拜

兄弟弟子洗酌於東方之尊阼階前北面舉觶於長兄弟釋曰自此盡乃羞論弟子舉觶將行旅酬之事云如主人酬賓儀者謂如上文主人酬賓就其階同北面並拜乃飲卒爵拜洗酌乃西面賓北面拜位故言如此

亦然弟子洗觶酌於東方之尊阼階前東面獻長兄弟  
長兄弟北面拜受弟子奠於薦南長兄弟坐取觶還西  
面拜弟子北面答拜長兄弟奠於薦北揖復位若有司  
徹云兄弟之後生者舉觶於其長長在左弟子自飲訖  
升酌降長拜受於其位舉爵者東面答拜鄭注云拜受  
答拜不北面者儻尸禮殺此不儻尸則拜送皆北面可  
知也弟子後生者此即有司徹云兄弟之後生者是也  
乃羞謂庶羞非薦又無內羞

乃羞 釋曰知羞非薦羞者上大夫受獻時皆設薦俎於其位故知此羞乃是庶羞非薦也云此所羞者自祝主人至於內賓者言自祝下及內賓及衆賓兄弟皆在可知又下記云公有司獻次衆賓私臣獻次兄弟則內賓亦及之是以少牢下篇云乃羞庶羞於賓兄弟內賓及私人不儻尸亦云乃羞於賓兄弟內賓及私人辯是也若然少牢與有司徹儻尸與不儻尸庶羞與房中羞皆與尸佐食及祝主人主婦皆同時羞之者彼上下大夫

禮尊故得與尸同時羞此士禮卑故不得與尸同也云  
無內羞者以其尸尊尚無內羞况祝卑

旅酬無筭爵堂上下參差不等

賓坐取觶阼階前北面酬長兄弟長兄弟在右 釋曰  
自此盡實觶於筐論行旅酬之間作止爵之事但此特  
牲之禮堂下行旅酬無筭爵並有室中者不與旅酬之  
事上大夫儻尸與旅酬不與無筭爵之事故別二人舉  
觶於尸侑得舉為旅酬偏及堂下尸與旅酬者以其儻

尸在堂禮殺故也若下大夫不儻尸者堂下無旅酬直行無筭爵於堂下而已尸則不與之所以下大夫無旅酬直有無筭爵者以其禮尸於室中辟國君堂下不設尊故無旅酬直行無筭爵而已以其堂下與神靈共尊不得與尸行旅酬故屈之此特牲堂下得旅酬無筭爵並行者以其堂下與神靈別尊故為加爵禮尸於室中酌上尊堂下旅酬行神惠酌下尊故上大夫及士之祭禮旅酬行無筭爵或行或不皆參差不等



旅酬無筭爵酌已尊酬人時酌彼尊

賓奠觶拜長兄弟答拜賓立卒觶酌於其尊 釋曰以

其旅酬無筭爵以飲者酌已尊酬人之時酌彼尊是各  
自其酒故無筭爵賓弟子及兄弟弟子舉觶於其長各  
酌於其尊也

為加爵者作止爵禮殺並作

為加爵者作止爵如長兄弟之儀 釋曰前衆賓之長  
為加爵如初爵止今還使為加爵者作止爵也故云如

長兄弟之儀云於旅酬之間言作止爵明禮殺並作者  
此決上文賓三獻爵止鄭注云三獻禮成欲神惠之均  
於室中是以奠而待之故有室中主人主婦致爵訖乃  
三獻作止爵此衆賓長為加爵如初爵止鄭注云尸爵  
止者欲神惠之均於在庭而堂下庭中行旅酬未訖為  
加爵者作止爵故鄭注云禮殺並作也

尸爵亦得為神惠無筭爵非神惠

賓弟子及兄弟弟子洗各酌於其尊云云舉觶於其長

釋曰自此盡爵無筭論二觶並行無筭爵之事云奠  
觶進奠之於薦右非神惠也者案上尊兩壺於阼階東  
加勺南柄西方亦如之鄭注云為酬賓及兄弟行神惠  
至此云非神惠者彼三獻止爵欲得神惠均於室中衆  
賓長為加爵止爵者欲神惠均於在庭故止爵行旅酬  
雖以尸而奠爵待之亦得為神惠至此別為無筭爵在  
下自勸故得為非神惠故奠於薦右同於生人飲酒

凡堂下皆北面凡拜受送皆北面

云凡堂下拜亦皆北面者前主人酬賓弟子舉於其長行旅酬及無筭爵兄弟弟子賓弟子舉觶皆北面則知凡堂下雖不見面位者皆北面拜可知云凡賓以下至於私人拜受送皆北面故云凡也

此言利即前佐食少牢兩見其名

利洗散獻於尸酢及祝如初儀降實散於籩釋曰自此盡西序下論佐食獻尸祭祀畢之事云利佐食也言利以今進酒也者利與佐食乃有二者以上文設俎

啓會爾敦之時以黍稷為食故名佐食今進以酒酒所以供養故名利利即養也故鄭云以今進酒也若然少牢名佐食上利執羊俎下利執豕俎者大夫禮大故即兩見其名

祭畢祝告利成禮有階上堂下之異

祝東面告利成 釋曰少牢云主人出立於阼階上南面祝出立於西階上東面祝告曰利成此戶外告利成彼階上告利成以尊者稍遠於尸若天子諸侯禮畢於

堂下告利成故詩楚茨云禮儀既備鐘鼓既戒孝孫徂位工祝致告鄭注云鐘鼓既戒戒諸在廟中者以祭禮畢孝孫徂位堂下西面位也祝於是致孝孫之意告尸以利成是尊者告利成遠所尸也云不言禮畢於尸間之嫌者間間暇無事若言禮畢則於尸間暇無事有發遣尸之嫌故直言利成而已也

尸謏主人降前尸出廟

尸謏祝前主人降 釋曰引少牢者證大夫禮主人立

位與士不同又證前尸出廟之事云前尸之儀士虞禮備矣者彼有室中出戶降階出廟前尸之事

徹庶羞不入於房而設於序以擬燕

徹庶羞設於西序下注為將餽去之庶羞主為尸非神饌也尚書傳曰宗室有事族人皆侍終日大宗已侍於賓莫然後燕私燕私者何也已而與族人飲也此徹庶羞置西序下者為將以燕飲與然則自尸祝至於兄弟之庶羞宗子以與族人燕飲於堂內賓宗婦之庶羞主

婦以燕飲於房 釋曰知非神饌而云為尸者以其尸  
三飯後始薦庶羞故徹之乃餽也凡餽者尸餽鬼神之  
餘祭者餽尸之餘義取鬼神之惠徧朝中庶羞非鬼神  
惠故不用也引尚書已下者是彼康誥傳文大宗已侍  
於賓奠者或有作養或有作暮者皆誤以奠為正也引  
之者證徹庶羞不入于房而設于西序下以擬燕故也  
必知祭有燕者案楚茨詩云鼓鐘送尸下云備言燕私  
鄭注云祭祀畢歸賓客之俎同姓則留與之燕所以尊



賓客親骨肉也其上大夫當日儻尸安有燕故有司徹  
上大夫云主人退注云反於寢也是無燕私若下大夫  
不儻尸與此士禮同亦當有燕也云與者以經直言設  
於序下不言燕疑之引書傳為證有燕故言與以疑之  
也云然則自尸祝以下知義如此者以兄弟受獻於堂  
上主婦內賓受獻於房中尸出之後堂房無事故知燕  
時男子在堂婦人在房可也

廟中分神惠猶君惠徧境內

筵對席佐食分簋鉶

釋曰自此盡尸外西面論嗣子

共長兄弟對餽之事云敦有虞氏之器者大夫異姓既用異代之器故少牢特性皆用敦則同姓之士當同周制周制用簋故經言分簋餼是鬼神之惠徧廟中若國君之惠徧境內是可以觀政之事

祝命佐食徹阼俎改饌西北隅為陽厭

祝命徹阼俎豆遽設於東序下 釋曰自此盡畢出論

徹薦俎改設饌於西北隅為陽厭之事云祝命徹阼俎

者是佐食徹之當徹阼俎之時堂下賓兄弟俎畢出故下文云佐食徹阼俎堂下俎畢出是也若然祝命徹阼俎時堂下俎畢出又退在下者欲見先徹室內俎乃徹堂下是以祝命佐食徹阼俎及豆籩又祝自執俎以出又宗婦徹祝豆籩入於房即佐食改饌西北隅是以作經并說室內行事乃到本云上佐食徹阼俎時堂下俎畢出也云命命佐食者此命命使徹阼俎下文云佐食徹俎故知

宗婦徹入房為主婦將燕內賓

宗婦徹祝豆籩入於房徹主婦薦俎 釋曰宗婦不徹  
主人豆籩而徹祝豆籩入房者為主婦將用之為燕祝  
兩豆籩而主婦用之者祝接神尸之類主婦燕姑姊妹  
及宗女宜行神惠故主人以薦羞并及祝庶羞燕宗人  
於堂主婦以祝籩豆用之燕內賓於房是其事也云宗  
婦既並徹徹其卑者以宗婦不徹主人籩豆而徹祝與  
主婦是徹其卑者

當室之白陽厭尸未入直飫神陰厭

佐食徹尸薦俎敦設於西北隅几在南扉用筵納一尊  
佐食闔牖戶降注扉隱也不知神之所在或諸遠人乎  
尸謬而改饌為幽闇庶其饗之所以為厭飫少牢饋食  
禮曰南面而饋之設此所謂當室之白陽厭也則尸未  
入之前為陰厭矣曾子問曰殤不備祭何謂陰厭陽厭  
也釋曰云不知神之所在或諸遠人乎禮記郊特牲  
之文彼論正祭與繹祭之事此為陽厭引之者欲見孝

子求神非一處故先為陰厭後為陽厭之事也引少牢者見彼大夫禮陽厭南面此士禮東面雖面位不同當室之白則同案曾子問庶殤為陽厭之事故彼云凡殤與無後者祭於宗子之家當室之白尊於東房是謂陽厭鄭注云當室之白謂西北隅得戶之明者也凡言厭者謂無尸直厭飫神故鄭云則尸未入之前為陰厭矣謂祭於奧中不得戶明故名陰厭對尸設之後改饌於西北隅為陽厭以向戶明故為陽厭也引曾子問云殤

不備祭何謂陰厭陽厭者彼上文孔子曰有陰厭有陽厭謂宗子有陰厭無陽厭凡殤有陽厭無陰厭曾子言謂殤死陰厭陽厭具有故問孔子孔子引宗子一有陰厭凡殤一有陽厭引之證成人陰厭陽厭並有之義也

凡主人拜送賓賓不答拜

祝告利成降出主人降即位宗人告事畢賓出主人送於門外再拜注拜送賓也凡去者不答拜 釋曰云凡去者不答拜者云凡摠解諸文主人拜送賓皆不答拜

鄭注鄉飲酒云禮有終是也若賓答拜是更崇新敬禮故不答也

衆賓自徹俎而出賓俎有司徹歸之

佐食徹昨俎堂下俎畢出注唯賓俎有司徹歸之鄭所以知歸賓俎者正見賓出主人送於門外再拜明賓不自徹俎主人使歸之若助君祭必自徹其俎鄭注曲禮大夫以下或使人歸之是以孔子世家云魯郊不致燔俎於大夫孔子不稅冕而行士大夫家尊賓則使歸之



自餘亦自徹而去也

記以特牲饋食上下始終皆朝服

記特牲饋食其服皆朝服玄冠緇帶緇鞶 釋曰此退

玄冠在朝服下者欲令近緇色士冠在朝服上從而正

也云皆者謂賓及兄弟筮日筮尸視濯亦玄端者見上

經云筮日主人冠玄端子姓兄弟如主人之服有司羣

執事如兄弟服筮尸云如求日之儀至於視濯又不見

異服故知皆玄端至祭日夙興云主人服如初初即玄

端明其餘亦如初是朝服可知是以此注云皆者謂賓及兄弟也云朝服者諸侯之臣與其君日視朝之服大夫以祭者案玉藻云諸侯朝服以日視朝下少牢云主人朝服是也

爵觚觶角散之大小貴賤

篚在洗西南順實二爵二觚四觶一角一散注順從也言南從統於堂也二爵者為賓獻爵止主婦當致也二觚長兄弟酬衆賓長為加爵二人班同宜接並也四觶

一酌奠其三長兄弟酬賓卒受者與賓弟子兄弟弟子  
舉觶於其長禮殺事相接禮器曰貴者獻以爵賤者獻  
以散尊者舉觶卑者舉角舊說云爵一升觶二升觶三  
升角四升散五升 釋云禮器曰貴者獻以爵者謂賓  
長獻尸主人致爵於主婦是也賤者獻以散上利洗散  
是也尊者舉觶謂若酌奠之及長兄弟酬賓之等是也  
卑者舉角謂主人獻用角鄭云下大夫也則大夫尊用  
爵士卑用角是也引舊說者爵觶已下升數無正文韓

詩雖有升數亦非正經故引舊說為證也

內兄弟南上北上取曲禮主婦南面

內賓立於其北東面南上宗婦北堂東面北上注二者所謂內兄弟內賓姑姊妹也宗婦族人之婦其夫屬於所祭為子孫或南上或北上宗婦宜統於主婦主婦南面北堂中房而北釋曰言所謂者上經云主人洗獻內兄弟於房中知獻衆兄弟之儀是也云其夫屬於所祭為子孫者以其在父行則謂之為母今言宗婦則其

夫屬於所祭死者之子孫之妻皆稱婦也云或南上或北上云內賓姑姊妹賓客之類南上自取曲禮云東鄉西鄉以南方為上宗婦雖東鄉取統於主婦故北上主婦南面故也云北堂中房而北者謂房中半已北為北堂也

饗者老婦之祭非火神燭柴失之

尸卒食而祭饔饗雍饗注舊說云宗婦祭饔饗者祭雍饗云亨者則周禮亨人之官其職主實鑊水饗亨之

事以供外內饗故使之祭饗饗也云用黍肉而已無籩  
豆俎者亦約禮器云盆瓶知之引禮器者案彼云孔子  
曰臧文仲焉知禮燔柴於奧鄭注云奧當為爨字之誤  
也或作竈禮尸卒食而祭饗饗饗也時人以為祭火  
神乃燔柴又云夫爨者老婦之祭也盛於盆尊於瓶注  
云老婦先炊者也盆瓶炊器也明此祭先炊非祭火神  
燔柴似失之引之者證祭爨之事也

賓送尸出門若有僨尸則尸出不送

賓從尸俎出廟門乃反位注從尸送尸也云士之助祭終其事也者謂送尸為終其事既送尸為終其事則更無儻尸之禮若上大夫有儻尸者尸出賓不送以其事終於儻尸故也

俎不言所折骨體略言散胥又略

衆賓及衆兄弟內賓宗婦若有公有司私臣皆散胥注又略此所折骨直破折餘體可散者升之俎一而已不備三者賤祭禮接神者貴凡骨有肉曰散祭統曰凡為

俎者以骨為主貴者取貴骨賤者取賤骨貴者不重賤者不虛示均也俎者所以明惠之必均也善為政者如此故曰見政事之均焉公有司亦士之屬命於君者也私臣自己所辟除者 釋曰云又略者上文長兄弟及宗人直言折不言所折骨體已是略此又不言折而言散胥是又略也言此所折骨值有餘體即破之可也云祭禮接神者貴者謂長兄弟及宗人已上俎皆三皆有臠肺以接神及尸貴故三體不止接神象所接尸者亦



貴可知自衆賓以下折體而已不接尸神賤無獻故也  
宗人雖不獻執巾以授尸亦名接尸也

祭祀有上事者貴之獻在後者賤

公有司獻在衆賓後私臣獻在兄弟後故云獻在後者  
賤也云祭祀有上事者貴之者謂衆賓兄弟次賓之卑  
得獻衆賓擇取公有司可執事者謂前舉鼎已載羞從  
獻衆賓擇取公有司酬爵之屬如此者門外在有司羣  
執事中入門列在東面為衆賓餘者在門西位也兄弟

雖無上事亦皆在西面位族親故也私臣獻在兄弟後者職賤公有司在衆賓後不執事賤於執事者故曰有上事者貴之宗人獻與旅齒於衆賓則公有司為之佐食於旅齒於兄弟則私臣之中擇為賓使為佐食也是以前文佐食北面立於中庭注云佐食賓佐尸食者是也

君賜爵有爵則以官無爵從昭穆

案祭統云凡賜爵昭為一穆為一昭與昭齒穆與穆齒

凡羣有司皆以齒此之謂長幼有序此不見昭穆位者  
主人衆兄弟非昭穆乎故彼注昭穆猶特牲少牢饋食  
之禮主人之衆兄弟也羣有司猶衆賓下及執事者君  
賜之爵謂若酬之是也若其有爵者則以爵序之何故  
然也案文王世子其在外朝則以官其在宗廟之中則  
如外朝之位宗人授事以爵以官是不以姓其獻之亦  
以官故祭統云尸飲五君洗玉爵獻卿尸飲七以瑤爵  
獻大夫尸飲九以散爵獻士及羣有司皆以齒明尊卑

之等是也其酬蓋因此位而昭穆得獻蓋依少牢下篇  
主人洗升酌獻兄弟阼階上注云兄弟長幼立飲賤不  
別大夫之賓尊於兄弟又曰辯受爵其位在洗東西面  
北上升受爵其薦胥設於其位注云先著其位於上乃  
後云薦胥設於其位明位初在是也此中皆無爵者以  
此二者差之知無爵者從昭穆有爵者則以官矣

賓主相酬主常在東同在賓中則尊右

賓酬長兄弟長兄弟在右長兄弟酬衆賓長自左受旅

如初是賓主相酬主人常在東其同在賓中則受酬者在左若鄉飲酒賓酬主人主人立於賓東主人酬介介立於主人之西其衆賓受介酬者自介右鄭注云尊介使不失故位衆受酬者受自左異其義也賓主相酬各守其位不以尊卑變同類之中受者於左尊右也

主婦俎觶折謂分後右足為俎

主婦俎觶折注觶後足折分也 釋曰案既夕記云明衣裳長及觶鄭注云觶足跗也是後足也云分後右足

以為佐食俎者少牢主婦用左臠此士妻辟之不用左臠用後右足不用後左足太卑

魚十有五象月盈尊卑俎同

魚十有五注魚水物以頭枚數陰中之物取數於月十有五日而盈少牢饋食亦云十有五而俎尊卑同此所謂經而等也

儀禮要義卷四十六

欽定四庫全書

儀禮要義卷四十七

宋 魏了翁 撰

少牢饋食禮一

鄭以少牢饋食為諸侯之卿大夫禮

少牢饋食禮第十六 釋曰鄭知諸侯之卿大夫者曲

禮下云大夫以索牛用大牢是天子卿大夫明此用少  
牢為諸侯之卿大夫可知賓尸是卿不賓尸為下大夫

為異也

養牛羊曰芻犬豕曰豢豕亦稱牢

少牢饋食之禮

釋曰自此盡如初儀論卿大夫祭前

十日先筮日之事云禮將祭祀必先擇牲繫於牢而芻

之者案周禮地官充人職云掌繫祭祀之牲拴祀五帝

則繫於牢芻之三月享先王亦如之注云牢閑也必有

閑者防禽獸觸齧養牛羊曰芻三月一時節氣成案楚

語諸侯卿大夫等雖不得三月亦皆有養牲之法故鄭



據焉言芻之唯據羊若犬豕則曰豢故地官槁人職云  
掌豢祭祀之犬樂記亦云豢豕作酒非以為禍不言豕  
曰豢文略也云羊豕曰少牢者對三牲具為大牢若然  
豕亦有牢稱故詩公劉云執豕於牢下經云上利升牢  
心舌注云牢羊豕也是豕亦稱牢也但非一牲即得牢  
稱一牲即不得牢名故郊特牲與士特牲皆不言牢

內事謂冠昏祭祀外事征伐巡守等

日用丁巳取其自丁寧變改

日用丁巳 釋曰云內事用柔日曲禮文彼云外事以剛日內事以柔日內事謂冠昏祭祀出郊為外事謂征伐巡守之等若然甲丙戊庚壬為剛日乙丁己辛癸為柔日今直言丁巳者鄭云取其令名自丁寧自變改皆為謹敬之義故也云必先諏此日明日乃筮者以其舉事尚朝旦不可今日謀日即筮是以此文云日用丁巳乃云筮旬有一日是別於後日乃筮也

筮旬有一日筮之日即齊

筮旬有一日 釋曰知旬十日者此云旬有一日以先  
月下旬之巳筮來月上旬之巳者除後巳之前通前巳  
為十日十日為齊後巳日則祭若然筮日即齊乃可故  
下文筮日即云乃戒官不云厥明也鄭直云下旬巳上  
旬巳據用巳一日而言若用丁言先月下甸丁筮來月  
上甸丁若丁巳之外辛乙之等皆然鄭必言來月上旬  
不用中甸下旬者吉事先近日故也

筮祭冠用祭服他事則否

筮於廟門之外主人朝服西面於門東 釋曰主人朝

服者為祭而筮還服祭服是以上篇特牲筮亦服祭服  
玄端以此而言天子諸侯為祭卜筮亦服祭服案司服  
云享先王則衮冕祭義云易抱龜南面天子衮冕北面  
雖有明知之心必進斷其志焉是為祭而卜還服祭服  
則諸侯為祭卜筮服祭服可知若為他事卜筮則異於  
此孝經注云卜筮冠皮弁衣素積百王同之不改易士  
冠主人朝服注云尊著龜之道

日用丁亥舉一以況餘或他亥亦可

主人曰孝孫某來日丁亥用薦歲事於皇祖伯某以某妃配某氏尚饗 釋曰云丁未必亥也直舉一日以言之耳者以日有十辰有十二以五剛日配六陽辰以五柔日配六陰辰若云甲子乙丑之等以日配辰丁日不定故云丁未必亥經云丁亥者不能具載直舉一日以丁當亥而言餘或以巳當亥或以丁當丑此等皆得用之也云禘於大廟禮曰日用丁亥者大戴禮文引之證

祭用丁亥之義也云不得丁亥則巳亥辛亥亦用之者  
鄭云此吉事先近日唯用上旬若上旬之內或不得丁  
巳以配亥或上旬之內無亥以配日則餘陰辰亦用之  
故春秋宣八年經書辛巳有事於大廟文二年經書八  
月丁卯大事於大廟昭十五年經書二月癸酉有事於  
武宮桓十四年乙亥嘗此等皆不獨用丁巳之日與亥  
辰也云無則苟有亥焉可也者此即乙亥是也必須亥  
者案月令云乃擇元辰天子乃耕注云元辰蓋郊後之

吉亥也陰陽式法亥為天倉祭祀所以求福宜稼于田故先取亥上旬無亥乃用餘辰

薦歲事于皇祖伯某鄭云且字非五十字

云伯某且字也者以某在伯下若某在子上者某是伯仲叔季以某且字不得在子上故也云大夫或因字為謚者謂因二十冠而字為謚知者以某且字者觀德明功若五十字人人皆有非功德之事故知取二十字為謚也春秋者案隱八年左氏傳云無駭卒羽父請謚與

族公問族於衆仲衆仲對曰天子建德因生以賜姓胙之土而命之氏諸侯以字為謚因以為族公命以字為展氏彼無駭之祖公子展以展為謚在春秋前其孫無駭取以為族故公命為展氏若然無駭賜族不賜謚引之者大夫有因字為謚證伯某某或且字有謚者即某為謚也此經云伯某是正祭之稱也若時有告請及非常祭祀則去伯直云且字言某甫則聘禮賜饗唯羹飪簋一尸若昭若穆僕為祝祝曰孝孫某薦嘉禮于皇祖



某甫是也若卿大夫無謚正祭與非常祭一皆言五十  
字在子上與士正祭禮同則云某子故聘禮記云皇考  
某子是也特牲士禮無謚正祭稱皇考某子若士告請  
之祭則稱且字故士虞記云適爾皇祖某甫

左執筮右手下韝擊筮

史曰諾西面於門西抽下韝左執筮右兼執韝以擊筮  
釋曰左執筮及下云擊筮筮者皆是著以其用著為  
筮因名著為筮云兼執韝者上文已用右手抽上韝此

經又用右手下韉是二韉兼執之也云易曰蓍之德圓而神者鄭彼注云蓍形圓而可以立變化之數故謂之神也引之者證蓍有神故擊而動之也

主人命筮史述命同辭命龜述命異

遂述命曰假爾大筮有常孝孫某來日丁亥用薦云云云遂述命者史既受主人命乃右還向闔外西面遂述上主人之辭謂之述命述命訖乃連言曰假爾大筮有常此是即席西面命筮與述命同為一辭者對士喪禮

卜葬曰云不述命若述命即與即席西面命龜異異者  
鄭注云述命命龜異龜重威儀多也對此大夫少牢述  
命命筮同筮輕威儀少為文也云常吉凶之占繇者謂  
應凶告吉應吉告凶則不常繇辭則占龜之長若易之  
爻辭

若不吉則及遠日至下旬丁巳不吉則止

若不吉則及遠日又筮日如初 釋曰云遠日後丁若  
後已者案上曲禮云喪事先遠日吉事先近日近日即

上旬丁巳是也若上旬丁巳不吉則至上旬又筮中旬丁巳不吉至中旬又筮下旬丁巳不吉則止不祭以其卜筮不過三也是以鄭云後丁若後巳也

大夫筮尸後宿尸戒尸士有宿無戒

宿注宿讀為肅進也古文作羞自此盡改筮尸論筮尸宿尸及宿諸官之事云大夫尊儀益多者其大夫宿戒兩有士有宿而無戒

尸神象故主人肅祝擯

吉則乃遂宿尸祝擯 釋曰云筮吉又遂肅尸重尸也  
者以其諸官一肅云祝為擯者尸神象者決前筮尸時  
皆主人出命至此使祝擯以尸是神象故使祝擯也案  
特牲使宗人擯主人辭又有祝共傳命者士卑不嫌兩  
有與人君同此大夫尊下人君故闕之唯有祝擯而已  
又此尸不言出門面位案特牲主人宿尸時尸如主人  
服出門左西面鄭注云不敢南面當尊則大夫之尸尊  
尸出門徑南面故主人與尸皆不在門東門西也

凡賓去皆拜送尸尊送主人揖不拜

主人再拜稽首祝告曰孝孫某來日丁亥用薦歲事于  
皇祖伯某以某妃配某氏敢宿告尸以主人為此事來  
肅尸拜許諾主人又再拜稽首主人退尸送揖不拜尸  
不拜者尸尊 釋曰凡賓主之禮賓去主人皆拜送今  
云尸送揖不拜者以大夫尸尊故也

宗人北面請祭期大夫尊有君道

主人門東南面宗人朝服北面請祭期主人曰比于子

宗人曰旦明行事 釋曰言比次早晏者一日一夜辰有十二冬日夏夜長短不同是以推量比次日辰之早晏也云主人不西面者大夫尊於諸官有君道也者決特牲主人門外西面士卑於屬吏無君道

特牲視牲視殺別日此同日君亦別日

明日主人即位于廟門之外云云牲北首東上司馬刲羊司士擊豕宗人告備 釋曰自此盡東榮論視濯之事案特牲視牲與視殺別日今少牢不言視牲直言刲

擊告備乃退者省比大夫禮視牲告充卽剗擊殺之下  
人君士卑不嫌故異日矣必知人君視殺別日者大宰  
職云及執事眡滌濯及納亨贊王牲事注云納亨納牲  
將告殺謂鄉祭之晨既殺以授亨人又云及祀之日贊  
玉幣爵之事注云日旦明也是其視牲與殺別日案祭  
義云君牽牲穆答君卿大夫序從既入門麗於碑卿大  
夫袒而毛牛尚耳諸侯禮殺於門內此大夫與特牲士  
皆殺於門外者辟人君



司馬以火官剗羊而擊豕乃非司空

云尚書傳曰羊屬火豕屬水者此尚書大傳文引之者  
解司馬剗羊以其司馬火官還使剗羊羊屬火故也案  
周禮鄭注司空奉豕司士乃司馬之屬官今不使司空  
者諸侯猶兼官大夫又職職相兼況士無官僕隸為司  
馬司士兼其職可知

雍爨羊豕魚腊之竈凡概陳之告挈

雍人概鼎匕俎于雍爨雍爨在門東南北上 釋云雍

人掌割亨之事者周禮饗人職文云凡擬者皆陳之而後告挈者案特性視濯時皆陳之視訖告挈此亦當然  
注羊豕魚腊皆有竈竈西有鎖

廩人掌米入故擬器于廩爨

廩人概甑甗匕與敦于廩爨廩爨在雍爨之北 釋曰云  
廩人掌米入之藏者周禮地官廩人職文以其穀入倉  
人米入廩人故也云甗如甑一孔者案冬官陶人職云  
甗實二鬴厚半寸脣寸甗實二鬴厚半寸脣寸七穿鄭

司農云甗無底甑以其無底故以一孔解之云匕所以匕黍稷者也者上雍人云匕者所以匕肉此康人所掌米故云匕黍稷也

鼎五在羊豕鑊之西魚腊與膚統於牲

羹定雍人陳鼎五三鼎在羊鑊之西二鼎在豕鑊之西釋曰自此盡簞巾於西階東論鼎及豆籩盤匱等之事云魚腊從羊膚從豕統於牲者案公食大夫云甸人陳鼎鄭注云甸人豕宰之屬兼亨人者此大夫雍人陳

鼎者周禮甸人掌供薪烝與亨饗聯職相通是以諸侯無亨人故甸人陳鼎此大夫又無甸人故使雍人與亨人聯職故亨人云職外內饗之饗亨故使饗人也云魚腊從羊膚從豕者上文概鼎時鄭云羊豕魚腊皆有竈今陳鼎宜各當其鑊此三鼎在羊鑊之西二鼎在豕鑊之西故云魚腊從羊膚從豕也其實羊豕魚腊各有鑊也此直有羊豕言皆有鑊前注何知魚腊皆有竈案士虞禮云側亨於廟門外之右東面魚腊饗在廟門外東

南

豕腸胃不實于鼎膚脅革肉

云豕無腸胃君子不食溷腴者禮記少儀文倫膚九知  
脅革肉者下文云膚九而俎亦橫載革順故知膚者是  
脅革肉倫擇也

凡設水用疊沃盥用枓佗文不具

司宮設疊水于洗東有枓設篚于洗西南肆 釋曰云

凡設水用疊沃盥用枓禮在此也者言凡摠儀禮一部

內用水者皆須疊盛之沃盥水者皆用料為之鄭言禮  
在此者以士冠禮直言水在洗東士昏禮亦直言水在  
洗東鄉飲酒特牲記亦云然皆不言疊器亦不云有料  
其燕禮大射雖云疊水又不言有料故鄭注摠云凡此  
等設水用疊沃盥用料其禮具在此故餘文不具省文  
之義也

祭時將至主人朝服于阼東

主人朝服即位于阼階東西面注為將祭也 釋曰自

此盡革順論祭時將至布設舉鼎七載之事

士以祝筵几此大夫官多故几席異官

司宮筵于奧祝設几于筵上右之 案特牲云祝筵几

鄭云使祝接神此使司宮者此大夫禮異於士故司宮設席祝設几大夫官多故使兩官

羊無別俎豕有膚俎以加故為下

陳鼎于東方當序南云云膚為下匕皆加于鼎東枋

釋曰此云膚為下門外陳鼎時不言至此言之者以膚

者豕之實前陳鼎在門外時東有俎據鼎所陳則膚在魚上今將載於俎設之最在後故湏分別之也云膚為下以其加者以羊無別俎而豕有膚俎故謂之加以加為下

前膚鼎不見心舌故此特明之

俎皆設于鼎西西肆所俎在羊俎之北亦西肆 釋曰以前膚鼎時不見心舌嫌不在爨故明之云皆如初為之于爨皆者皆羊豕羊豕皆有心舌也案特牲記云所



俎心舌皆去本末午割之實于牲鼎載心立舌縮俎即  
是未入鼎時則制此心舌然也既未入鼎時先制之是  
以雖出爨亦得為皆如初爨也云凡割本末食必正也  
者鄉黨孔子云割不正不食故割本末為食正也云所  
之為言敬也者郊特牲文彼云所之為言敬也言所以  
敬尸也云周禮祭尚肺者禮記明堂位云有虞氏祭心  
殷祭肝周祭肺是周之禮法祭肺而此所俎不取肺而  
用心者以其事尸尚心舌心舌知滋味者故特牲記鄭

注亦云心舌知食味者欲尸之饗此祭

實鼎曰升實俎曰載今實俎亦言升

上利升羊載右胖者不升注升之以尊卑載之以體次  
案升羊載右胖者准例實鼎曰升實俎曰載今實俎而  
言升者以其升者上也是以載兩言之也但此經所載  
牲體多少一依上文升鼎不異而重序之者以其載俎  
之時恐與入鼎時多少有異

鄭以俎拒為介距之距謂俎脰中橫節

勝三胃三長皆及俎拒云云 云拒讀為介距之距者

案左氏傳昭二十五年云季郈之雞鬪季氏介其雞服  
氏云擣芥子播其雞羽鄭氏云介甲為雞著甲又云郈  
氏為之金距注云金距以金踏距今鄭君合取季氏之  
介又取郈氏之距而云介距之距也引之者彼距在雞  
足為距此俎距在俎為橫也是以云俎距脰中當橫節  
也案明堂位云俎有虞氏以梲夏后氏以巖殷以棋周  
以房俎注云梲斷木為四足而已巖之言屨也謂中足

為橫距之象周禮之距彼注云周禮謂之距即指此組距而言是距為組足中央橫者也此言組距脛中當橫節者案明堂位夏后氏以歲謂中足之橫下仍有殷之棋謂橫下仍有曲撓之足下又有周之房組謂四足下更有跗鄭云上下兩間有似於堂房是橫下更有二事故言脛中當橫節也

下利升豕進下食生人進腠腠是本

下利升豕其載如羊無腸胃體其載於組皆進下釋

云進下變於食生也者決公食大夫鄉飲酒牲體皆進  
腩腩是本是食生人之法此言進末末為終謂骨之終  
食鬼神法故云變於食生也云所以交於神明者特性  
文云不敢以食道檀弓文

載魚皆右首有進腩進鰭進尾進首異

司士三人升魚腊膚魚用鮒十有五而俎縮載右首進  
腩釋云右首進腩亦變于食生也者凡載魚為生人  
首皆向右進鰭其祭祀亦首皆在右進腩生人死人皆

右首陳設在地地道尊右故也鬼神進腴者腴是氣之所聚故祭祀進腴也生人進鰭者鰭是脊生人尚味故公食大夫云魚七縮俎寢右鄭注云右首也寢右進鰭也乾魚近腴多骨鯁是也云有司載魚橫之少儀曰羞濡魚者進尾引之者欲見正祭與饋尸載魚禮異又與生人食禮不同以其尸之禮上大夫載魚橫之於人為縮於俎為橫既見乾魚則進首可知復取少儀者濡魚進尾見與乾魚異有司徹進首是上大夫繹祭饋尸之

禮有乾魚橫於俎宜進其首則少儀羞濡魚者是天子諸侯繹祭可知以其天子諸侯繹祭乾濕皆有乾魚則進首鮮魚則進尾必知是天子諸侯繹祭者以其大夫儻尸云如牐祭少儀云祭牐又與儻尸加牐祭於上同故知義然也

腊亦進下如羊豕載禮始見於此

腊一純而俎亦進下肩在上注如羊豕凡腊之體載禮在此 釋曰以諸經唯有腊文無升載之事故云載禮

在此

儀禮要義卷四十七



欽定四庫全書

儀禮要義卷四十八

宋 魏了翁 撰

少牢饋食禮二

卒胥以後為陰厭之事

卒胥至戶內西面注將納祭也 釋曰自此盡主人又再拜稽首論先設置為陰厭之事也

此惟一人與主婦同服士妻與助祭同服

主婦被錫衣侈袂薦自東房韭菹醯醢坐奠於筵前主婦贊者一人亦被錫衣侈袂執葵菹羸醢以授主婦主婦不興遂受陪設於東韭菹在南葵菹在北主婦興入于房 釋曰云主婦贊者一人亦被錫者此被錫侈袂與主婦同既一人與主婦同則其餘不得如主婦當與士妻同纚笄綃衣若士妻與婦人助祭一皆纚笄綃衣以綃衣下更無服服窮則同故特牲云凡婦人助祭者同服

被錫讀為髮髻取賤者髮被髻

云被錫讀為髮髻者欲見髻取人髮為之之義也云古者或剔賤者刑者之髮以被婦人紒為飾因名髮髻焉者此解名髮髻之意案哀公十七年左傳說衛莊公登城望戎州見已氏之妻髮美使髡之以為呂姜髡是其取賤者髮為髮之事也云此周禮所謂次也者見周禮追師

敦象龜周飾器如脰鳴胷鳴各以類

主婦自東房執一金敦黍有蓋坐設於羊俎之南婦贊者執敦稷以授主婦主婦興受坐設於魚俎南又興受贊者敦黍坐設於稷南又興受贊者敦稷坐設於黍南敦皆南首主婦興入於房釋曰敦有首者尊者器飾也飾蓋象龜知有此義者以其經曰敦南首明象龜獸之形故云首知象龜者以其蓋形龜象故也云周之禮飾器各以其類者案周禮梓人云外骨內骨以脰鳴者以胷鳴者之類鄭云刻畫祭器博庶物也又周禮司

尊彝有雞彝之等是周之禮飾器各以其類也云龜有  
上下甲者欲言此敦蓋取象之意以龜有上下甲故敦  
蓋象之是亦取其類也敦蓋既象龜明簋亦象龜為之  
故禮器云管仲饒簋朱紘注云謂刻而飾之大夫刻  
為龜耳諸侯飾以象天子飾以玉言以玉飾之還依大  
夫象形為飾也天子則簋敦兼有九嬪職云凡祭祀贊  
玉盥注云玉盥玉敦受黍稷器是天子八簋之外兼用  
敦也特牲云佐食分簋鉶注云為將餼敦有虞氏之器

也周制士用之變敦言簋容同姓之士得從周制耳則同姓大夫亦用簋特牲少牢用敦者異姓大夫士也明堂位云有虞氏之兩敦夏后之四璉殷之六瑚周之八簋鄭注云皆黍稷器制之異同未聞案周禮舍人注圓曰簋孝經注直云外方曰簋者據而言若然云未聞者據殷已上未聞周之簋則聞矣故易損卦云二簋可用享注云離為日日圓巽為木木器象是其周器有聞也孝經緯鉤命決去敦規首上下圓相連簋簋上圓下

方法陰陽是有聞而鄭云未聞者鄭不信之故也

先設饌後酌酒酒尊饌由尊者成

祝酌奠遂命佐食啟會佐食啟會蓋二以重設於敷南  
釋曰酌奠酌酒為神奠之者以其迎尸之前將為陰  
厭為神不為尸故云為神奠之也云後酌者酒尊要成  
也者上經先設餘饌此經乃酌者酒尊物設饌要由尊  
者成故後設之也引特牲者酌奠之處當在鉶南此經  
不言故引為證

釋柔毛剛鬣嘉薦普淖

主人西面祝在左主人再拜稽首祝祝曰孝孫某敢用  
柔毛剛鬣嘉薦普淖用薦歲事於皇祖伯某以某妃配  
某氏尚饗主人又再拜稽首注羊曰柔毛豕曰剛鬣嘉  
薦菹醢也普淖黍稷也普大也淖和也德能大和乃有  
黍稷春秋傳曰奉粢以告曰絜粢豐盛謂其三時不害  
而民和年豐也釋曰云羊曰柔毛豕曰剛鬣下曲禮  
文羊肥則毛柔濡豕肥則鬣剛也彼注云號生物者異



於人用也引春秋者證黍稷大和之義案彼左氏桓六年傳文

主人不出迎尸尸在廟門外疑於臣

祝出迎尸於廟門之外主人降立於阼階東西面云云  
釋曰自此盡牢肺正脊加於所論尸入正祭之事云主  
人不出迎尸伸尊也者禮記云君迎牲而不迎尸別嫌  
也尸在廟門外則疑於臣在廟中則全於君故主人皆  
不出迎尸尸在廟門外為臣道故主人不出迎尸伸尊

也引特牲者尸出入時主人與賓西位上皆逡巡辟位

尸入祝主人再拜妥尸

祝主人皆拜妥尸尸不言答拜遂坐 釋曰案爾雅

妥安坐也故云拜妥尸拜之使安坐也案特牲云尸啐

酒告旨主人拜尸答拜祭鉶嘗之告旨不得遂坐此經

云答拜遂坐故鄭解其遂坐而卒食之意以其間有不

啐奠不嘗鉶不告旨也大夫之禮尸彌尊故無拜事特

牲所云嘗鉶謂嘗豕鉶此不嘗鉶謂不嘗豕鉶也知非

不嘗羊釧者案下云嘗羊釧故知不嘗豕釧也不告旨者既不啐奠故無告也言彌尊者既不啐奠一尊又不嘗釧不告旨是彌尊也云不告旨者為初亦不饗者案特牲迎尸即席坐主人拜妥尸尸答拜執奠祝饗主人拜如初注云饗勸強之也其辭取於士虞記則宜云孝孫某圭為而孝薦之饗是士賤不嫌得與人君同大夫尊嫌與人君同故初不饗後亦不告旨故云不告旨者為初亦不饗也

黍稷之祭為墮尸尊神餘故祭

上佐食取黍稷于四敦云云兼與黍以授尸尸同受祭於豆祭云黍稷之祭為墮祭者肺與黍稷俱得為墮故周禮守祧職既祭則藏其墮墮中豈不能兼肺肺與黍稷俱祭於苴上上既藏之明肺與黍稷器不動人就器減取之故特得墮名舉肺則全取因上絕之不得墮稱及其藏之并有墮名也云將食神餘尊之而祭之者謂陰厭是神食神食後尸來即席食尸餽鬼神之餘故

尸亦尊神而祭之以其凡祭者皆不是盛主人之饌故以祭之為尊也

古飯黍不用箸就器中取而食之

上佐食爾上敦黍於筵上右之 釋曰曲禮云飯黍無以箸是古者飢食不用匙箸若然器即不動器中取之故移之於席上便尸食也

此食舉在羞所下與特牲文異

食舉 釋曰此食舉在羞所之下特牲食舉在羞所之

上不同者彼特牲食舉下乃云羞所俎者是其正以食  
舉後尸即嚙幹之屬即加於所俎故食舉後即進所是  
正也此食舉不在羞所之上上佐食羞鉶羹尸祭鉶訖  
乃得食舉故退食舉在祭鉶之下又不退羞所在食舉  
下者由主人敬尸故不退在下也特牲爾敦下設大羹  
此不云者大羹不為神直是為尸者故此不言儻尸乃  
有也

食大名據一口亦謂之飯

三飯注食以黍 釋曰知先食黍者以前文先言爾黍云食大名者以其論語文多言食故云食大名也云小數曰飯者此少牢特牲言三飯五飯九飯之等據一口謂之一飯五口謂之五飯之等據小數而言

尸告飽祝勸侑天子諸侯亦當然

尸告飽祝西面云云獨侑不拜侑曰皇尸未實侑 釋云侑勸也祝獨勸者更則尸飽者此決特牲九飭三侑皆祝主人共侑不更以侑者欲使尸飽若其重侑則嫌

相褻特牲重脩不更者以上禮九飯縱更亦不飽故不更此大夫禮十一飯更則飽故有更是以使祝獨脩與主人更之義云祝既脩復反南面者戶內主人及祝有事之位尸席北祝無事之位今脩訖亦復尸北南面位也此與特牲皆有尸飯法天子諸侯亦當有之故大祝九拜之下云以享脩祭祀注云脩勸尸食而拜若然士三飯即告飽而脩大夫七飯告飽而脩諸侯九飯告飽而脩天子十一飯而脩也



主人醑尸取饒羨之義

乃醑尸尸拜受主人拜送 釋曰自此盡折一膚論主人醑尸之事云醑猶羨也者取饒羨之義故以為樂之人

祝代尸酌主人又俠爵拜彌尊尸

祝酌授尸尸醕主人主人拜受爵尸答拜主人西面奠爵又拜云彌尊尸者此少牢與特牲尸酢主人使祝代尸酌者已是尊尸今主人拜受訖又拜為俠拜是彌尊尸也

綏祭即按墮同取墮減之義

上佐食取四敦云云下佐食取牢云云以綏祭案經中綏是車綏或有禮本作按者故亦讀從周禮守祧既葬則藏其墮取墮減之義也云將受嘏者下文主人受嘏之時先墮祭是以佐食授黍稷與主人為墮禮

尸常坐有事則起主人常立有事則坐

主人左執爵右受佐食坐祭之又祭酒不興遂啐酒

釋曰云尸常坐有事則起主人常立有事則坐者案禮

器云周坐尸曲禮云立如齊鄭云齊謂祭祀時則是尸  
常坐主人祭時則常立經云坐祭之謂墮祭尸餘是尸  
與主人為禮是主人有事乃坐也尸答主人拜乃立是  
尸有事則起也

尸使祝嘏主人士禮尸親嘏

二佐食各取黍於一敦上佐食兼受搏之以授尸尸執  
以命祝卒命祝祝受以東北面於尸西以嘏於主人曰  
皇尸命工祝承致多福無疆於女孝孫來女孝孫使女

受祿於天宜稼於田眉壽萬年勿替引之注命祝以嘏  
辭嘏大也予主人以大福工官也承猶傳也來讀曰釐  
釐賜也耕種曰稼勿猶無也替廢也引長也言無廢止  
時長如是也古文嘏為格祿為福眉為微替為袂袂或  
為戴戴替聲相近 釋曰云嘏大也者郊特牲云嘏長  
也大也故鄭云予主人以大福崇特牲尸親嘏主人此  
尸使祝嘏主人者大夫尸尊故不親嘏特牲無嘏大不  
具也

天子嘏辭與大夫同詩懷筐受異

主人坐奠爵興再拜稽首云云詩懷之云云案少牢饋食禮主人受嘏詩懷之卒爵執爵以興出宰夫以籩受醬黍主人嘗之乃還獻祝此鬱人受王之卒爵亦王出房時也是王受嘏與大夫同也案楚茨詩既齊既稷既匡既勅注云嘏之禮祝徧取黍稷牢肉魚孺於醢以授尸孝孫前就尸受之天子使宰夫受之以筐祝則釋嘏辭以勅之天子嘏辭與大夫同也云復嘗之者重之

至也者前已嘑之是已嘗今復言嘗是重受福之至也  
特牲不言復嘗者文不具也

大夫士廟皆五架棟北為室

主人獻祝設席南面祝拜於席上坐受注室中迫狹

釋曰言迫狹大夫士廟室也皆兩下五架正中曰棟棟  
南兩架北亦兩架棟南一架名曰楣前承簷以前名曰  
廡棟北一架為室南壁而開戶即是一架之開廣為室  
故云迫狹也必知棟北一架後乃為室者昏禮主人延

賓升自西階當阿東面致命鄭云阿棟也入堂深明不入室是棟北乃有室也

尸言拜送禮重祝言答拜禮輕

主人西面答拜注不言拜送下尸 釋曰上主人酌尸尸拜受主人拜送今主人獻祝祝拜受主人答拜拜送禮重答拜禮輕

主人獻祝不拜既爵大夫祝賤

祭酒啐酒云云卒爵興 釋曰亦如佐食授爵乃興者

此經直云卒爵興不云授爵故特明之案下文主婦獻祝祝卒爵坐授主婦爵主婦又獻二佐食二佐食坐授主婦爵主婦獻祝與獻二佐食同明主人獻祝祝授主人爵亦與二佐食同可知云不拜既爵大夫祝賤也者此決特牲祝卒角拜主人答拜以士卑故祝不賤

男女不相授器不相因爵

有司贊者取爵於篚以升授主婦贊者於房中 釋曰云自此盡入於房論主婦亞獻祝獻尸與佐食之事此



直云有司授婦贊者於房案禮記內則云非祭非喪不相授器其相授則女受以篚其無篚則皆坐奠之而后取之此經雖不言受以篚及奠於地之事亦當然也云男女不相因者案特牲佐食卒角主人受角降反於篚升入復位訖主婦乃洗爵於房酌亞獻尸是不相因爵也引特牲者證男女不相因爵主婦不取此爵也

特牲賓長獻尸爵止此致爵在儻尸上

賓長洗爵獻於尸尸拜受爵賓尸西北面拜送爵尸祭

酒卒爵

案特牲賓長獻爵止注云欲神惠之均於室

中待夫婦致爵此大夫禮或有儻尸者致爵在儻尸之上故不致爵爵不止也若然有司徹尸作止爵三獻致爵於主人主人不酢主婦又不致爵於主婦下大夫不儻尸賓獻尸止爵主婦致爵於主人酢主婦主人不致於主婦特牲主人與主婦交相致爵參差不同者此以尊卑為差降之數故有異也上大夫得儻尸故致爵上辟人君下大夫不儻尸故增酢主婦而已士卑不嫌與

君同故致爵具也

事尸之禮訖於廟門

主人出立於阼階上云云祝告曰云云祝先尸從遂出於廟門 釋曰自此盡廟門論祭祀畢尸出廟之事注事尸之禮訖於廟門者上祝迎尸於廟門今禮畢又送尸於廟門案禮記尸在廟門外則疑於臣是以據廟門為斷

祝徹所俎不出廟門將饋尸

祝反復位於室中主人亦入於室 釋曰自此盡篇末  
論徹所俎行餽之事云徹所俎不出門將饋尸也者決  
特牲佐食徹尸俎出廟門者送尸者也云所俎而以饋  
尸者其本為不反魚肉耳案曲禮云毋反魚肉謂食時  
魚肉不反俎

司士乃辯舉謂舉膚

知舉是舉膚者以其尸舉肺餽者下尸明不舉肺當舉  
膚是以特牲云佐食授餽者各一膚明此大夫禮亦舉

膚也

主人不拜受爵總答一拜大夫餽賤

卒食主人洗一爵升酌以授上養云云授次養云云云  
不拜受爵者大夫餽者賤也者決特牲使嗣子與兄弟  
餽為貴故拜受爵也云答壹拜畧也者特牲亦無再拜  
法此言畧者以其四餽皆拜主人摠答一拜

凡賓出主人皆拜送

送佐食不拜賤 釋曰賓主之禮賓出主人皆拜送此

佐食送之而不拜

儀禮要義卷四十八